

Malaysia perlu kekal pendekatan tersendiri

UM 27/10/03

KUALA LUMPUR 26 Okt. — Datuk Seri Dr. Mahathir Mohamad berkata, Malaysia perlu mengekalkan pendekatan dan cara tersendiri dalam mencapai kemajuan di samping menjamin kemajuan itu terus berkekalan.

Perdana Menteri berkata, adalah menjadi harapan beliau untuk melihat rakyat di negara ini terus maju dan hidup dalam keadaan selesa setelah beliau bersara kelak.

“Kita telah berjaya dalam membina sebuah negara yang memberikan kehidupan yang baik, yang memberikan kita kebanggaan, yang dihormati semua dan kita mesti cuba mengekalkan cara kita ini supaya di

tahun-tahun akan datang Malaysia akan terus maju.

“Inilah harapan kita semua, ini juga harapan saya setelah saya berundur dalam bidang politik,” katanya.

Dr. Mahathir menyatakan demikian ketika berucap merasmikan Perhimpunan Agung Parti Progresif Penduduk (PPP) Ke-50, di Pusat Dagangan Dunia Putra (PWTC), di sini hari ini.

Kira-kira 4,000 perwakil dan pemerhati hadir pada perhimpunan yang turut dihadiri oleh Timbalan Perdana Menteri, Datuk Seri Abdullah Ahmad Badawi dan pemimpin-pemimpin parti komponen Barisan Nasional (BN).

Perdana Menteri berkata, beliau amat berpuas hati dan gembira kerana rakyat di negara ini masih memberikan sokongan kepadanya walaupun beliau akan bersara beberapa hari lagi.

Dr. Mahathir berkata, beliau gembira kerana pengundurannya dalam bidang politik adalah kerana bersara dan bukannya ‘dihalau’ dari arena itu.

“Saya merasa amat berpuas hati dan gembira kerana tidak dihalau daripada arena politik sebaliknya saya masih mendapat sokongan semasa saya hendak bersara,” katanya.

Dr. Mahathir yang juga Pengerusi BN pada majlis itu turut mengulanginya kenyataan ba-

hawa beliau tidak akan terlibat atau memegang sebarang jawatan dalam kabinet selepas bersara nanti.

Sebaliknya, beliau berjanji akan terus membantu BN mencapai kejayaan dalam pilihan raya akan datang.

“Saya tidak akan jadi ‘Senior Minister’ dalam kabinet tetapi bila datang pilihan raya, saya akan berkempen untuk BN,” tegasnya sambil diberikan tepukan gemuruh oleh seluruh perwakil.

Ini kerana kata Dr. Mahathir, hanya BN sahaja yang boleh membawa kebaikan dan kemajuan kepada Malaysia.

“Saya telah bekerja dalam kerajaan sejak tahun 1974 dan sehingga

sekarang telah masuk 29 tahun dalam kerajaan dan 22 tahun menjadi Perdana Menteri dan sudah tiba masanya saya bersara.”

Bagaimanapun, beliau berharap agar parti-parti komponen BN terus bekerja keras untuk mengekalkan kejayaan sekarang.

Dr. Mahathir menambah, BN adalah gabungan parti-parti politik dan kemajuan gabungan itu adalah bergantung kepada kemajuan parti-parti komponen.

“Sebagai parti komponen BN, saya berharap dan yakin PPP akan memberikan sumbangan baik kepada kejayaan BN,” katanya.